



EDITORIAL

Magbalik-tuon sa teorya kag kasaysayan para isulong ang praktika sang rebolusyon

Lubos kapagsik subong nga ginasulong sa bilog nga rebolusyonaryong hublag ang isa ka lapnagon nga hublag pagbalik-tuon sa Marxismo-Leninismo-Maoismo kag mga basehang prinsipyo sang Partido. Tuman ka aktibo ang mga komite kag kadre sang Partido, subong man ang mga kumander kag hangaway sang Bagong Hukbong Bayan (BHB) kag mga aktibista sa kahublagang masa sa kaumhan kag kasyudaran, sa ginahimo nga pagbalik-tuon sa teorya kag mga prinsipyo bilang armas para sa pagrebolusyon.

Sa sentro sang kahublagan pagbalik-tuon nga ini amo ang sinulatan kag tudlo nga ginbilin ni Ka Joma (Jose Maria Sison), ginarespeto nga titser sang rebolusyong Pilipino, nga nanguna sadto sa paglatag sang mga basehang prinsipyo, polisiya, estratehiya kag mga taktika sang Partido sa pagsulong sang duha-ka-halintang nga rebolusyon sa Pilipinas.

Lakip sa lubos nga ginabalik-tun-an sang mga kaupod ang mga malahalang nga dokumento nga ginahimo sa pagpanguna ni Ka Joma ang: Iwasto ang mga Pagkakamali at Muling Itatag ang Partido, Ang Mahigpit Nating mga Tungkulin, Mga Partikular na Katangian ng Ating Digmang Bayan, Muling Pagtibayin ang Ating Saligang mga Prinsipyo at Iwasto ang mga Pagka-

kamali, kag ang Manindigan Para sa Sosyalismo Laban sa Modernong Rebisyunismo.

Puno sang kapagsik nga ginarebyu sang mga kaupod ang iban pang mga libro kag sinulatan ni Ka Joma pareho sang Makibaka para sa Pambansang Demokrasya kag Lipunan at Rebolusyong Pilipino. Ang mga ini klasikong mga sinulatan nga nagapabilin santo sa kongkretong kundisyon sang Pilipinas nga ginapigos sang imperyalismo, pyudalismo kag burukrata kapitalismo. Ginatun-an ang mga ini kadungan sa mga klasikong sinulatan sang mga dunganon nga titser komunista pareho nanday Marx, Engels, Lenin, Stalin, Mao kag Ho. Ginapresentar sang mga ini ang unibersal nga kamatuoran bahin sa kasaysayan sang ma-

kasahing banggianay kag ang kaki-nahanglanon para sa rebolusyonaryong pagbag-o agud tapuson ang pagpanghimulos kag pagpamigos.

Ang nagabwelo nga kahublagan pagtuon nga ini ginbunga sang panawagan sang sentral nga liderato sang Partido nga gamiton ang ginbilin nga kabang-manggad sang mga gintudlo ni Ka Joma bilang ubay sa pagsulong sang rebolusyon. Kabahin man ini sang panawagan nga sumahon ang mga inagihan sa nagligad nga lima kag 25 tuig, kag tumuron kag sikwayon ang mga suhetibistang pagsayup nga nagtuga sang mga kahalitan o nangin sablag sa pagsulong sa nagkalainlain nga patag sang hili-kuton, kag kumprehensibong isulong ang rebolusyonaryong hublag.

Sa diwa sang “wala sang rebolusyon kon wala sang rebolusyonaryong teorya,” ginagamit subong sang mga kadre sang Partido ang Marxismo-Leninismo-Maoismo kag ang mga gintudlo ni Ka Joma para magtasar kag magsuma sa ila mga praktikal nga inagihan, agud bug-u-son ang determinasyon nga tadlu-

ngon ang mga ini kag pangibabawan ang mga kahinaan kag pagsayup. Nagabalik-tuon sila sa kasaysayan agud magkuha sang mga positibo kag negatibong leksyon, pabaskugon ang mga husto nga praktika kag likawan nga suliton ang mga pagsayup.

Yabi ang kahublagan pagtuon nga ini sa konsolidasyon sang Partido. Kinahanglan ang lubos nga pagpalig-on para masakbat sang mga ini ang mga mabug-at nga tulungdan sa pagpamuno.

Ang kahublagan sa pagtuon kabahin sang pangkabilugan nga pagtinguha nga pataason ang kinaalam teoritikal kag hugton ang hakos sang tanan nga kadre kag mga aktibista sa mga prinsipyo kag ideolohiya sang Partido, bilang ubay sa pagpasulong sang ila rebolusyonaryong praktika. Ginapataas sini ang militansya kag determinasyon sang Partido kag sang masang Pilipino nga magbato sa tunga sang sobra ka brutal nga pagpamigos sang reaksyunaryong estado.

Todo-todo subong ang pagtinguha sang mga komite sang Partido nga patapuson ang mga kadre kag katapu sa 3-lebel sang Kurso sang Partido. Mas basehan pa, ang mga indi makabasa ginatudluan nga magbasa paagi sa programa pangliterasi. Paagi sa mga pagtinguha nga ini, sige-sige nga ginapataas sang

Partido ang ikasarang sang mga kadre kag katapu sang Partido nga pamunuan ang nagkalainlain nga patag sang hilikuton sa nagkalainlain nga lebel. Ginahanas man sini ang mga bag-ong henerasyon sang mga komunistang lider kag hangaway.

Ginagamit ang Marxista-Leninista-Maoista nga kinaalam kag pamaagi sa paganalisa para magpanalaw-saw sa kongkretong kahimtangan, sa mga problema kag gilayon nga demanda sang masang Pilipino. Ginaat-hag sini nga ang pagtaas sang presyo sang mga balaklon, manubo nga suhol, kawad-on sang duta, kag nagkalainlain nga problema sang masa sa matag-adlaw nakaugat sa permanente kag nagalala nga krisis sang garuk nga sistemang malakolonyal kag malapyudal. Ginapakita nga ang pag-antus kag kabudlayan sang obreros kag masang anakbalhas sa Pilipinas pareho sa esensya sa ginaag-yan sang masang pigos kag ginahimuslan sang monopolyong kapitalismo sa iban nga bahin sang kalibutan.

Ginapalig-on ang determinasyon sang mga rebolusyonaryong pwersa nga sakdagon ang linyang masa, kag ubos-kusog nga maghulag para pukawon, organisahon kag pahulagon ang minilyon nga mamumugon, mangunguma kag tanan nga pigos kag ginahimuslan nga sahi kag



sektor. Ang kahublagan pagtuon nga ini nagapataas sa kapagsik sang mga rebolusyonaryong pwersa kag mga aktibista nga magpropaganda sa mga pabrika, mga eskwelahan, baryo kag iban pang lugar agud buyukon ang masa nga maghugpong kag pataason ang determinasyon nga baktason ang dalan sang ululupod nga pagbato para ihayag ang ila mga reklamo kag isulong ang ila mga interes.

Sa kaumhan, ang kahublagan pagtuon nga ini labing nagapagsik sa mga Pulang hangaway nga ubos-kusog nga hugton ang paghi-lusa sang masa kag sang ila hangaway, palaparon kag pabaskugon ang mga prenteng gerilya, batuan ang terorismo sang estado, kag lubos kaisog nga isulong ang pagpakig-away gerilya.

Paagi sa kahublagan pagtuon, ginaubayan kag ginatudluan sang Partido ang BHB agud labing papagsikon ang lapnagon kag masingki nga pagkig-away gerilya base sa nagapalapad kag nagapadalom nga baseng masa, kag huluhalingtang nga pabaskugon ang BHB halin sa gamay kag maluya padulong sa daku kag mabas-kog nga hangaway sang pumuluyo.

Bug-os-kusog nga nagapursiger ang mga hangaway kag aktibista nga pahulagon ang masang mangunguma para ipakigbato ang tunay nga reporma sa duta kag iban pa nila nga mga demanda sa tunga sang krisis kag delubyo nga dala sang rehimeng Marcos. Ginapalapad kag ginapalig-on ang mga organisasyong masa kag ginapanggas ang binhi sang demokratikong gubyerno sang banwa. Katuwang sini, ginakasa ang mga taktikal nga opensiba para amat-amat nga papason ang kaaway, kuhaon ang iya mga armas, kag huluhalingtang nga pabaskugon ang BHB.

Sa sulod sang subong nga tuig, ginalauman naton nga ang kahublagan pagtuon nga ini magabunga sang mabakod nga pagsulong sang bilog nga rebolusyonaryong hublag sa kaumhan kag kasyudaran kag pagpapagsik sang mga paghimakas sang pumuluyo para sa pungsodnon nga kahilwayan kag demokrasya. **AB**

<div><div></div><div>Tuig LIV No. 2 Enero 21, 2023</div></div>	
<div>Ang Ang Bayan ginabantala sa lenggwahe nga Pilipino, Bisaya, Iloco, Hiligaynon, Waray, Ingles kag Espanyol. Nagabaton ang Ang Bayan sang mga kontribusyon sa porma sang mga artikulo kag balita. Ginaganyat ang mga bumalasa nga magpaabot sang mga pagsaway kag rekomendasyon sa pagpauswag sang aton nga pahayagan.</div>	
<div><div>Kaundan</div><div><div>Editorial: Magbalik-tuon sa teorya kag kasaysayan para isulong ang praktika sg rebolusyon1</div><div>Pangpartido nga pagtuon, ginlunsar sa NCMR3</div><div>Ka Elay, modelo nga kadre kg hangaway3</div><div>Mga protesta3</div><div>Halin kwarantina pakadto sa kaumhan4</div><div>HRV, magasingki5</div><div>2 aktibistang gindukot sa Cebu, nabawi na6</div><div>Ambus sa Sorsogon, isnayp sa Negros6</div><div>Pamilya, ginmasaker sa Northern Samar6</div><div>Lapsag, 2 tuig na nga <i>hostage</i> sg militar6</div><div>Nagatinaas nga presyo sg pagkaon, serbisyo7</div><div>Sa malip-ot nga pulong8</div><div>Paggamit sg US sa Pilipinas9</div><div>Base militar sg US sa Palawan10</div><div><i>Aerial bombing</i> sa komunidad sa India10</div><div>Presensya sg US sa Cagayan, ginasiikway10</div></div></div>	
<div>Ang Ang Bayan ginabantala duha ka beses kada bulan sang Komite Sentral sang Partido Komunista ng Pilipinas</div>	
<div><div> ang.bayan@cpp.ph</div><div> @angbayan1969</div></div>	

Pangpartido nga pagtuon, ginlunsar sa eryang ekspansyon sa NCMR

MAKAHAS KAG DETERMINADO NGA ginlunsar sang isa ka yunit sang Bagong Hukbong Bayan (BHB) sa isa sa mga eryang ekspansyon sa North Central Mindanao Region (NCMR) ang pagtuon sa Basehang Kurso ng Partido (BKP) sang ulihing kwarto sang 2022. Sa pihak sang nagkalainlain nga hangkat, madinalag-on nga nakatapos sa pagtuon ang 17 hangaway sang BHB.

Nag-umpisa ang pagtuon sang Nobyembre 26, 2022 kag nagtapos sang Disyembre 18, 2022. Tanan nga estudyante sang BKP mga pamatan-on nga mangunguma kag 2-3 tuig na nga katapo sang hangaway sang BHB.

Samtang ginahiwat ang pagtuon, nagdeploy ang hangaway sang banwa sang isa ka yunit para sa hilikuton masa kag pangkatilingban nga pagpanayatat sa kaiping nga mga komunidad. Bangud ara sa erya nga ekspansyon, nagaumpisa pa lang ang pagpagsik sang paghulag sang masa sa lugar, nga sa idalom sang pasistang paghari sang mga pwersa sang reaksyunaryong estado.

Pila ka beses nga naatrasar ang pagtuon bangud kinahanglan magsaylo sang kampo para makalikaw sa mga operasyon sang kaaway. Kada saylo sang kampo, nagbinuligay ang mga hangaway nga estudyante kag instruktora para makatukod liwat sang eskwelahan para padayunon ang pagtuon.

Sa pihak sini, wala nalingkang ang yunit sa mga hangkat kag natapos ang pagtuon. “Kadam-an sa ila nagbalik ang kapagsik! Madugay-dugay man abi nga liwat nakalunsar sang kurso,” hambal sang isa sa mga instruktora.

“Mas determinado ako nga magpursiger sa rebolusyon bangud nahibal-an ko ang gin-agan nga kapaslwan sang Partido kag nasarangan niya nga magpursiger kag mag-abanse,” pahayag sang isa ka estudyante.

Ka Elay, modelo nga babayeng kadre kag hangaway

GINPASIDUNGGAN SANG KOMITE Sentral sang Partido Komunista ng Pilipinas si Helenita Parladi, 65, isa ka nagapamuno nga kadre sang Partido nga napatay sang nagligad nga tuig. Kilala siya sang masa kag mga kaupod sa Bicol kag Samar bilang si Ka Ning, Ka Eliz, Ka Celine kag Ka Elay.

Kalakip siya sa ginatos nga kababainhang kadre sang Partido nga nagpas-an sang mga mabug-at nga katungdanan para isulong kag pauswagon ang inaway banwa.

Sa nagligad nga mga tuig, ginpamunuan niya ang pag-atubang sa wala-untat nga mga atake kag operasyon sang kaaway paagi sa nagalapad kag nagapadalom nga gerilyang pagpakig-away sa Eastern Visayas. Napatay siya sa pagpamomba nga ginhimo sang militar sang Nobyembre 23, 2022 upod ang lima pang hangaway sa Barangay Imelda, Las Navas, Northern Samar. Sa adlaw nga ina, 50 beses nga ginbomba sang militar ang lugar sa kalapit nga komunidad halin 1:30 sang kaagahon tubtob 5:30 sa aga.

Nagdaku sa Bicol, una nga nagserbi nga upisyal sang Partido si Ka Elay sa isa ka prenteng gerilya sa Camarines Sur tubtob nangin sekretaryo sang bilog nga prubinsya sang dekada 1990. Gintalana siya bilang ikaduha nga sekretaryo sang National Peasant Bureau nga nagtigayon sang abante nga mga kampanyang agraryo kag sa ulihi, ikaduha nga sekretaryo sang komite sang Partido sa Eastern Visayas.

Nabotohan siya bilang myembro sang Komite Sentral sa Ikaduha nga Kongreso sang 2016. Sekretaryo siya sang komite sa rehiyon sang Partido sa Eastern Visayas sa panahon sang iya pagkapatay. Ginapanubli niya sa tanan nga rebolusyonaryong pwersa ang hugot nga paghiliusa sa tunga sang hangaway sang banwa kag sang masa.



Pangapinan ang mga tagapangapin. Gintamyaw sang mga demokratikong organisasyon kag tagasupporta ang 10 tagapangapin sang tawhanong kinamatarung, tawong simbahan kag lider-masa sa Quezon City sang Enero 9 pagkatapos ibasura sang korte ang kaso nga *perjury* nga ginpasaka batuk sa ila ni Gen. Hermogenes Esperon.

Pangapinan ang kinamatarung nga mag-organisa. Nagpiket ang mga myembro sang Migrante kag Kilusang Mayo Uno sa Department of Justice sang Enero 16 para iduso nga himuan sang aksyon sang estado ang lainlain nga pag-atake sa ila mga myembro. Natabo ang paghulag pila ka adlaw antes ipubliko sang International Labor Organization ang resulta sang imbestigasyon sini sa kahimtangan sang mga mamumugon sa pungsod.

Isa ka adlaw antes sini, nagkadto sa pungsodnon nga upisina sang DOLE sa Maynila ang mga mamumugon halin sa Southern Tagalog para ipanawagan ang kinamatarung sa pag-union, makabuhi nga suhol kag regular nga trabaho. Nagkadto sila sa Mendiola pagkatapos sini.

SIM Card Registration, ginapauspinder. Nagpiket sa atubang sang National Telecommunications Commission ang mga aktibista para sa *digital rights* sa idalom sang Junk Registration Network para ipanawagan ang pagsuspinder sang mapiguson kag kontrapumuluyo nga pwersahan nga pagparehistro.

Hustisya para kay Ka Manny. Ginsulong sang mga mamumugon kag aktibista ang DOJ sang Enero 18 pagkatapos iabswelto sini ang kaso batuk sa 17 pulis nga nagpatay kay Manuel Asuncion, koordineytor sang Bayan sa Cavite. Ginpatay si Ka Manny sang 2021, upod sang walo pa sa ginatawag nga Bloody Sunday.

Halin sa kwarantina pakadto sa kaumhan

Ang masunod estorya sang isa ka katapo sang Kabataang Makabayan nga nakig-isa sa pagsaulog sang Partido sa ika-54 anibersaryo sini sa isa sa mga prenteng gerilya sang hangaway sang banwa.

Pagkatapos sang Paskwa, gilayon ako nga naghanda sang mga gamit nga kinahanglanon para sa amon pagbisita. Ginpangibabawan sang kakunyag ang akon kakulba sa mga bagay nga wala ko mabibal-an. Duha na gid man ka tuig ako nga katapo sang Kabataang Makabayan (KM) pero bangud sa ginpapanaog nga tuman kahugot nga lockdown sa tabon sang Covid-19, ini ang una nga kahigayunan nga masaksihan ko ang mga estorya nga sadto nabatian ko lang.

Daw madali lang ang byahe. Pag-abot sang gab-i, nalab-ot namon ang sityo kon sa diin kami sugaton. Ginakulbaan ako nga uyat ang akon nga bag samtang nagatan-aw sa nagapadulom na nga dalan nga amon pagaagyan. Wala maglawig nag-umpisa na kami sa paglakat. Madasig ang pagpitik sang akon tagipusuon sa paglakat sa lugar nga indi ako pamilyar.

Wala na nagdugay labi nga nagsiok ang dalan—madulom, malutak kag batuhon. Sa matuod lang, madugay ko na nga ginapamensar nga indi ko masarangan maglakat sa lutakon. Bilang petiburges nga nagdaku sa kasyudaran, maarte ako kag indi ko gusto nga malutakan. Indi man ako sagad maglakat sa mga batuhon nga lugar o bisan mismo sa paglakat. Indi ko gusto nga makapoy kag mabalhasan.

Sa pihak sini, puno sang pasensya nga ginbuligan ako sang mga kaupod. Gilayon nila nga ginatanyag ang ila nga kamot sa gulpe ko nga pagpangayo sang bulig. Diri ko napamatud-an kon ano kaayo sang aton nga mga hangaway, handa sila nga magbulig masiguro lang ang amon nga kaluwasan. Nadumduman ko dayon sadto ang ginpaambit ko nga wala ako sang perspektiba nga magkadto sa kaumhan—sa tan-aw ko abi nga indi ko masarangan nga mabuhi diri. Sabat sa akon sang kadam-an: “magsalig sa mga kaupod nga mag-alalay sa imo.”

Kaagahon na sang nakaabot kami sa ila nga pwesto. Pag-abot ginpahigda kami sa amon nga tulugan. Nabudlayan ako nga magrelaks sa umpisa pero sang ulihi nakatulog

man dala sang kakapoy. Dugay-dugay nakabugtaw ako sa gahod sang mga kaupod nga masako nga naghanda. Nabugtawan ko ang palibot nga masanag. Preska ang huyop sang hangin. Pagbalikid ko, nakita ang mga hangaway nga nagapulog. Una ko nga napensar, “kabugalon nila nga tan-awon, daw mga bida sila sa anime nga natan-aw ko.”

Ang mga madason nga oras puno sang estoryahanay kag pagkinadlaw. Amat-amat kami nga nagkilalahay sang mga kaupod. Sa estoryahanay, natun-an ko ang mga sakripisyo kag kakinahanglanon nga magpursiger sa patag nga ginpili nila nga usuyon.

Pag-abot sa lugar kon sa diin ilunsar ang selebrasyon, napakita sa amon ang mga himo nga obra sang mga kaupod. Sa tunga makita ang isa ka napinta kon sa diin nakasulat ang tema nga : “Konsolidahon kag labing palig-unon ang Partido! Paslawon ang kontra-rebolusyonaryong gera kag terorismo sang estado sang rehimeng US-Marcos! Kumprehensibo nga isulong ang demokratikong rebolusyon sang banwa!” Kag sa pihak magtimbang may pulang bandera sang Partido. Sa kilid sini may ara nga garab kag maso nga nakaukit sa duta. Simbolo ini sang pagsaludo sa dungganon nga titser kag tagaalagad sang masang Pilipino nga si Jose Maria “Ka Joma” Sison.

Pag-abot sang udto nag-umpisa na ang programa. Una nga nagkanta sang “Internationale.” Nagdayaw ako nga nagatan-aw sa tanan. Akon nga ginaisip nga sa kadalag-an, mas madamo pa nga Pilipino ang dululungan nga magaamba sang kanta nga

ini. Naghalad sang mga pangkultura nga pagpasundayag ang mga kaupod nga hangaway. Indi ako makapati nga amo sila kaayo. Indi lang sila hangaway, sila man mga artista sang banwa! Malipayon nga nagapulog ang pamatan-on sa mga pagpasundayag. Makita sa mga guya sang mga bisita ang ila nga kalipay.

Pagkagab-i naghanda na kami sa amon nga paghalin. Sa malip-ot nga panahon sang pagpabilin namon nahimo ko gilayon nga makahimo sang maayo nga angut sa mga kaupod nga hangaway kag masa nga naupod namon. Nagpauli ako nga wala sang paghinulsol. Diri ko mas napalig-on ang akon nga mga perspektiba—nga husto ang dalan nga akon ginausoy. Sa pila ka adlaw ko sa kaumhan, madamo nga estorya kag leksyon ang akon nga bitbit pauli.

Nangin mas madasig ang paglakat pabalik, daw sa nakabisar ko na sa malip-ot nga panahon ang dalan kag pamaagi sa paglakat. Sa pagmag-an sang byahe pauli, nahibal-an ko ang bug-at sang mga katungdanan kag hilikuton nga kinahanglanon para sa pagdaog sang rebolusyon. Indi madula sa akon isip ang mga tinaga nga ginsambit sa tunga-tunga sang programa.

“Nagapabukid kita bangud diri mas kinahanglanon sang pag-alagad sa masa.” Subong, mas maathag sa akon ang aktwal nga itsura sang armadong paghimakas, mas malig-on ang mga basehan para sa pagpadayon sang away kag pagpalig-on sang aton kubay—pag-upod sa mga paghimakas sang masang anakbalhas kag pag-alagad sa masang pigos. AB



Pagpang-abuso sa tawhanong kinamatarung, magasingki sa pag-inagaway sang mga heneral

Magasingki ang pagpang-abuso sa tawhanong kinamatarung samtang pa-dayon ang banggianay sang mga heneral sa idalom sang magpartner Marcos-Duterte. Nagsugod ang mga ilinaway nga ini sadtong tunga-tunga sang 2022 kag naglupok sa unang mga adlaw sang 2023. Ang mga “banggianay” nga ini nagasalaming sa madalom nga kontradiksyon sa kubay sang magkaalyado nga dinastiya sa pulitika kag guban sa sulod sang nagahari nga rehimeng Marcos.

Sa tuyo nga mauntat ang bangaan para sa kurakot kag tapnaon ang nagauk-ok nga disgusto nga mahimo magkadto sa destabilisasyon, ginbalasa ni Ferdinand Marcos Jr ang mga yabing pusisyon sa depensa, militar kag pulisya. Ginsipa niya sa pwesto ang gintalana niya nga upisyal kag ginbalik ang pinakamalaut nga mga heneral nga nagserbi sa panahon sang rehimeng Duterte.

Nagsugod ang *rigodon* sa liwat nga pagtalana kay Gen. Andres Centino bilang *chief of staff* sang Armed Forces of the Philippines (AFP), ang pusisyon nga ginhatag ni Marcos kay Lt. Gen. Bartolome Bacarro, ginakilala nga “manok” ni Unang Ginang Liza Araneta-Marcos kag sang sadto Executive Sec. Vic Rodriguez. Bilang protesta wala sang dungog nga pagsipa kay Bacarro, nagbiya bilang *officer-in-charge* sang Department of National Defense (DND) si anay Gen. Jose Faustino Jr. Ginsundan siya sa pag-resayn sang lima pa ka senyor nga mga upisyal sang DND. Ginbaylo sa iya si Gen. Carlito Galvez Jr, anay *presidential adviser on the peace process* kag hepe sang sobrang palpak kag puno sang korapsyon nga pagsabat sang rehimeng Duterte sa pandemya nga Covid-19.

Pinakaulihi nga ginsipa sa pusisyon si Prof. Clarita Carlos, nga nauna na nga gin-initan sang mga heneral bangud sa iya panawagan nga buhinan ang badyet sang NTF-Elcac. Ginbulos sa iya ang ultra-militarista nga si Gen. Eduardo Año bilang National Security Adviser (NSA).

Samtang nagainagaway ang mga heneral kag koronel sa mga matambok nga pusisyon sang AFP, ginpaidalom sa “full alert” ang bilog nga pwersa sang Philippine National Police (PNP). Suno sa burges nga midya, may naglapta nga memo bahin sa tuyo nga kudeta kag destabilisasyon. Ginsundan ini sang pakitang-tawo nga pagparesayn sa 800 pulis-heneral sa ila mga pusisyon.

Sa atubang sang ginatawag nga “hampang sang mga heneral,” nagpahayag sang pagkabalaka ang mga progresibo kag demokratikong organisasyon bangud labing magasingki ang mga abuso sa tawhanong kinamatarung kag mga krimen sa gera. Kilala sanday Año, Galvez kag Centino sa pinakabrutal kag pinakamahirigko nga hulag sa gera kontra-pumuluyo. Malaba kag duguon ang listahan sang ila mga paglapas sa tawhanong kinamatarung kag mga internasyunal nga makatawong layi. Madumduman ang mga ini, upod ang anay *adviser* sang NSA nga si Gen. Hermogenes Esperon, ang pinakadaku nga sablag sa sugilanon pangkalinungan.

Labing naghugot ang pag-uyat sang militar sa burukrasyang sibil sa pagnombrar kanday Año, Galvez kag

Centino. Sandig sa doktrina nga “anti-terorismo” kag anti-komunistang kontra-insurhensya sang US, ang militar magapadayon sa pagtumod kag pagdikta sa mga polisiya sang estado kag ibutang ang mga ahensyang sibilyan sa kontrol sini pareho sa ginapaluntad sang National Task Force to End Local Communist Armed Conflict (NTF-Elcac).

Sa pagbalik sang mga heneral ni anay presidente Duterte, lauman nga magapadayon ang mga brutal nga taktika sa kontra-insurhensya. Pagasablagan nila ang sugilanon pangkalinungan sa tunga sang National Democratic Front of the Philippines kag Government of the Republic of the Philippines. Ang bokabularyo nga nahibal-an nanday Año, Galvez kag Gentino amo ang solusyon militar. Ang kalinungan nga nahibal-an lang nila amo ang “kalinungan sang sementeryo”.

Sa atubang sini, ginmanduan sang Partido ang tanan nga mga komite sini, subong man ang mga yunit sang BHB nga hingalitan ang mga banggianay, pagkagumon kag maniobrahan sa sulod sang AFP kag PNP. Dapat sila nga maglunsar sang propaganda kag edukasyon sa sulod sang militar kag pulis, labina sa pinakamanubo nga kubay para buyukon sila nga talikdan ang garuk nga organisasyon kag makigbuligay sa mga rebolusyonaryong pwersa.

Siling sini, ang mga banggianay nga ini magauntod nga magauntod sa mga operasyon kontra-insurhensya, labina kon may maniobra nga kudeta kag kontra-kudeta sang mga tropa. Dapat mag-inisyatiba ang BHB kag pasingkion ang hilikuton militar kag pulitika sa bilog nga pungsod kag mag-ani sang daku sa atubang sang kinagamo sang kaaway.



2 aktibista sa Cebu, gindukot kag ginbuhian

Napilitan nga buhian sang mga pwersa sang estado ang duha ka aktibista nga Cebuano sang Enero 16 pagkatapos magbaskog ang panawagan nga ituhaw sila. Pwersahan nga ginsakay sa isa ka *van* sang mga nagpakilala nga pulis sanday Dyan Gumanao kag Armand Dayoha sa pantalan sang Cebu sang udto adlaw sang Enero 10 sa tunga sang madamo nga nakasaksi. Gin-dala sila sa isa ka *safehouse* kon sa diin ginpaidalom sila sa sikolohikal nga tortyur. Gintuhaw sila sa isa ka resort sa banwa sang Carmen pagkatapos magpagwa ang pamilya sang mga laragway sang pagdukot sa ila.

Si Gumanao koordineytor sang Alliance of Concerned Teachers para sa Rehiyon 7 samtang si Dayoha boluntir para sa tsapter sang Alliance of Health Workers sa Cebu. Ang duha lunsay gradweyt sang University of the Philippines-Cebu.

Sa isa ka bidyo nga kuha sang isa ka saksi, makita ang pwersahan nga pagpasakay sa duha sa isa ka duag abo nga SUV nga nakaparada sa mismo pantalan sang barko nga ginadumilian ang mga pribadong salakyan. Antes nagtuhaw ang bidyo nga ini, ginpangin-wala sang mga upisyal sang pantalan, pulis kag tinawo sang barko nga ginsakyan nila nga may “insidente sang pagdukot” sa lugar sa adlaw nga ina. Panawagan sang pamilya kag mga grupo sang tawhanong kina-matarung ang independyente nga imbestigasyon kaangot sang pagdukot indi lang sang mga pulis kundi lakip ang mga tinawo sa pantalan.

Pagpatay. Sa katambi nga isla sang Negros, duha ka mangunguma ang ginpatay kag isa ang gintuyo nga patyon sang militar sa nagligad nga duha ka semana. Pareho sa iban nga kaso, ginpagwa sini nga napatay sila sa mga engkwentro sa mga yunit sang BHB.

Sa Guihulngan City, ginpatay sang mga suldado sang 62nd IB si Orlando Fat sa Sityo Banderahan, Barangay Trinidad sang Enero 10. Gintuyo man nga patyon si Rodrigo Pasinabo sa Sityo Cambaogon sang Enero 15.

Ang mga ini kabahin sang operasyong kombatan sang 62nd IB sa mga barangay nga ara sa lindero sang Guihulngan City, Canlaon City kag banwa sang Moises Padilla.

Sa Himamaylan City, ginpatay sang mga suldado sang 94th IB ang 49-anyos nga mangunguma nga si Jose Gonzalez sa Purok Maliko-liko, Sityo Cunalom, Barangay Carabalan sang Enero 9. **AB**

Ambus sa Sorsogon, isnayp sa Negros, ginlunsar sang BHB

TATLO KA PASISTANG SULDADO sang Armed Forces of the Philippines (AFP) ang napatay sa mga armadong aksyon sang Bagong Hukbong Bayan (BHB) sa isla sang Negros kag Sorsogon sang Enero 15.

Gin-ambus sang BHB-Sorsogon ang nagaoperasyon nga 18-katawo nga tropa sang 22nd IB kag CAGU sa Barangay Calmayon, Juban, Sorsogon. Isa ka myembro sang CAGU ang napatay samtang duha ang nararong. Ang gin-ambus nga yunit lakip sa tropa nga nag-operasyon sa mga kaiping nga barangay sang Calmayon, Maalo kag Calateo sa banwa sang Juban kag Barangay Calpi kag Dolos sa banwa sang Bulan umpisa pa 2020.

Nagasulunod nga operasyon isnayp ang ginlunsar sang BHB-Central Negros sa pareho nga adlaw. Napatay diri ang duha ka suldado. Una nga gin-isnayp sang mga Pulang hangaway ang tropa sang 62nd IB sa Sityo Palasan, Barangay Guba, Vallehermoso, Negros Oriental. Pag-abot sang alas-6 sang gab-i, gin-isnayp naman sini ang mga suldado sa Sityo Batang-batangan, Barangay Bucalan, Canlaon City.

Pamilya, ginmasaker sa Northern Samar

ISA KA PAMILYA ANG ginmasaker sang mga suldado sang 43rd IB sa Kilometer 9, Barangay Happy Valley, San Isidro sa Northern Samar sang Nobyembre 18, 2022. Ginapagwa sang mga teroristang suldado nga sila mga hangaway sang BHB nga napatay sa engkwentro. Nakapaidalom sa grabeng operasyong kombatan ang lugar.

Sa ulihing kwarto sang 2022, indi magnubo sa tatlo ka serye sang pagpamomba ang ginlunsar sang militar sa prubinsya. Sang Oktubre 1, 2022 indi magnubo sa 25 bala sang kanyon ang ginbuhian sang mga suldado gamit ang 105mm kag 155mn *howitzer* sa mga ulumhan sa Barangay Paco, Las Navas, Northern Samar. Ginsundan ini sang isa pa ka pagpamomba sa Barangay San Isidro sang Nobyembre 11, 2022.

Lapsag, 2 tuig na nga hostage sang militar

DUHA KA TUIG NA NGA nakabulag sa iya pamilya ang subong 2-tuig nga si Baby Marx Cairo Salino. Sang Enero 13, 2021, gin-agaw siya sang 79th IB sa isa ka reyd sa balay sang pamilya Madin sa Hacienda Ambulong, Barangay San Fernando, Talisay City, Negros Occidental.

Halin sadto, uyat na sang militar ang lapsag kag indi pag-ibalik sa kostudiya sang mga paryente. Si Baby Marx anak nanday Ka Peeta kag Ka Jandy, pareho nga hangaway sang Bagong Hukbong Bayan sa Negros.

Gingamit sang militar nga *hostage* si Baby Marx para pasurenderon ang iya ginikanan. Gindingot siya sang DSWD sa iya lolo kag lola bangud kinahanglan pa kuno nga “konsultahon” ang militar.

Paliwat-liwat man nga ginpaidalom sa pagpang-ipit, pagpamahog kag pagpanilag ang lolo kag lola ni Baby Marx. Sang unang kwarto sang 2022, ginreyd sang mga suldado ang ila temporaryo nga ginapuy-an. Bangud diri, napilitan sila nga magtago.

Sa unang bulan sang 2023:

Nagatinaas ang presyo sang pagkaon, basehan nga serbisyo

Magkadungan nga delubyo sang nagasirit nga presyo sang basehan nga mga balaklon kag serbisyo pangkatilingban kag wala untat nga pag-ulan kag pagbaha ang nagsumalang sa pumuluyong Pilipino sa pagsulod sang 2023. Sa atubang sini, wala sang solusyon ang rehimeng Marcos sa nagalala nga krisis sa pangabuhian maluwas sa pakitang-tawo nga mga tikang.



Nagatinaas nga presyo sang pagkaon

Nagapabilin nga nalansang sa ₱400-₱550 ang kilo sang sibuyas sa merkado bangud sa pagtago, pagmanipular sa suplay kag tuman ka sobra nga pagpresyo sang mga kartel sa agrikultura. Bunal sa konsyumer ang tuman kataas nga presyo samtang nagapabilin nga luhaon kag lubong sa utang ang mga mangu nguma sang sibuyas bangud sa pagkaputo.

Suno sa Kilusang Magbubukid ng Pilipinas, naglab-ot lang sa ₱30 kada kilo ang *farmgate price* sang sibuyas sang nagligad nga tig-alani sa Nueva Ecija. Sa pihak nga bahin, nagagasto ang mangunguma sang ₱150,000 kada siklo sang pagtanom. Sa Occidental Mindoro, nagsadsad pa ini sa ₱8-₱15 kada kilo.

Ginpaambit ni Merlita Gallardo, asawa sang isa ka mangunguma sang sibuyas sa Pangasinan, nagpanginmatay ang iya nga bana sang 2021 bangud sa pagkaputo. Maluwas kay Gallardo, may apat pang iban nga manugsibuyas ang nagpanginmatay.

Mapait pa gihapon ang kape bangud sa nagapabilin nga tuman kataas nga presyo sang kalamay. Ang repinadong kalamay ara sa ₱90 tubtob ₱110 kada kilo samtang ₱80 tubtob 96 ang *brown sugar*. Nagtaas ini sang halos ₱10-₱15 kumpara sa ulihing kwarto sang 2022. Pareho sang nagligad nga mga rehimen, importasyon ang solusyon ni Marcos sa krisis sa pagkaon. Sang Enero 10,

ginpahanugutan niya ang pagimport sang 17,000 metriko tonelada sang pula nga sibuyas kag 3,960 metriko toneladang puti nga sibuyas. Ini sa pihak sang magaani na sang lokal nga sibuyas sa Pebrero.

Samtang, nagaplano ang guberno nga magimport sang tubtob 450,000 metriko tonelada sang kalamay subong nga tuig sa tabon sang pag-untat sa nagatimbuok nga presyo.

Ginbuyagyag sang sini lang sang mga prodyuser sang itlog nga sige-sige pa nga magataas ang presyo sang itlog sa merkado subong nga tuig. Ara na sa ₱9-₱10 subong ang kinaandan nga presyo sang medyum kadaku nga itlog, halin sa ₱6.90-₱8.50 sang Disyembre 2022.

Bisan pa man, madamo na nga tindahan ang nagabaligya sang regular kadaku nga itlog sang ₱10 kada isa.

Isa sa ginatumod nga kabangdanan sang mga prodyuser ang pagbwelo sang *bird flu* nga tubtob subong wala ginaasikaso sang Department of Agriculture. Suno sa datos sang Bureau of Animal Industry, apektado sang pandemya nga ini ang 20 prubinsya sa walo ka rehiyon. Nagresulta ini sa pag-ihaw sa apektado nga 1.8 milyon manok.

Maluwas diri, may pamahog man nga pagtaas sang ₱2 kada kilo sa presyo sang bugas sa palaabuton nga binulan. Ginalauman ang pagtaas man sang presyo sang tinapay bangud sa pagtaas sang presyo sang itlog kag iban pang sangkap.

Gasolina, kuryente, tubig kag pamasaha

Subong nga Enero, nagtaas na sang neto nga ₱3.1/litro ang presyo sang gasolina samtang ₱0.8/litro ang kerosene. Ginbutong sini pakadto sa abereyds nga ₱70 kada litro ang gasolina.

Gin-anunsyo sang Manila Electric Company (Meralco) subong nga bulan nga magataas ang sukot sini sa kuryente sang ₱0.62 kada *kilowatt-hour* (kWh). Magasukot na ini sang ₱10.9 kada kWh subong nga bulan. Sa regular nga konsumo sang isa ka pamilyang Pilipino nga 200 kWh, nagakahulugan ini sang dugang nga ₱125.

Samtang, pagaumpisahan na nga kuhaon subong nga Enero ang dugang-sukot sa yutilidad nga tubig sa Metro Manila nga ₱8.04 kada metro kubiko para sa mga naka-kunekta sa Manila Water samtang ₱3.29 kada metro kubiko ang sa Maynilad.

May pangulba man nga pataason ang pamasaha sa LRT subong nga tuig. Mahimo ini nga dugangan sang ₱2.29 para sa pagsakay kag ₱0.21 sa mga masunod nga kilometro. Ang daan nga pamasaha nga ₱13 mahimo mangin ₱15 samtang ang mas malayo nga byahe nga nagabalor sang ₱15 mangin ₱20. Pataason ang sukot sa pamasaha kada duha ka tuig sandig sa kontrata sang pribadong mga kumpanya nga nagapang-iya sa tren kag guberno.

Samtang, natalana nga pataason ang *liquefied petroleum gas* (LPG) sa palaabuton nga Pebrero. **AB**

9 nga bilyunaryong Pilipino

may manggad nga mas daku sangsa **55 milyong** Pilipino

Ginkuhaan: Oxfam Pilipinas



32 Blackhawk helikopter


nga ginkontrata nga baklon sang AFP sa balor nga **P32 bilyon**.

P45 B

badyet para sa modernisasyon sang AFP sa 2023

pagkatapos dugangan sang **P6 bilyon** sang Kongreso sa tunga sang away sang mga heneral para sa kurakot.

228




yabi nga biodiversity area

o mga lugar nga malahalon para sa ikaayong lawas sang planeta ang natumod sang mga syentista sa Pilipinas, pero 91 lamang diri ang protektado.

Ginkuhaan: International Union for Conservation of Nature

70

paryente, alipures kag negosyante



ang gin-upod ni Marcos Jr sa pagpanglugayawan sa **Switzerland** sang Enero 16-20 sa pagtambong niya sa World Economic Forum. Ang byahe nga ini pang-8 na sa sulod sang 7 bulan.

JMSU

Joint Marine Seismic Undertaking,



22 syudad kag munisipalidad

ang nakapaidalom sa **state of emergency** halin Disyembre 2022 dulot sang mabaskog nga pagbaha bangud sa mga pag-ulan.

isa ka kasugtanan sa tunga sang Pilipinas, China kag Vietnam para minahon ang **West Philippine Sea** gindeklarar nga **indi konstitusyunal** sang Korte Suprema sang Enero 10.

60,000

lapsag kag bata nga Pilipino



ang **napatay sang 2021** antes mag-5-tuig ang edad dulot sang mga kumplikasyon sa ikaayong lawas nga sarang malikawan.

Ginkuhaan: United Nations Inter-Agency Group for Child Mortality Estimation

324 ginpatay sa paltik nga gera kontra-droga sang 2022,



49 sa ulihi nga 6 bulan ni Duterte kag **175** sa unang 6-bulan ni Marcos.

Paggamit sang US sa Pilipinas sa paghanda sa gera kontra China

Hayagan nga ginabastos sang gubyernong Biden sang US ang kahilwayan sang Pilipinas sa ginahimo sini nga paghanda sang “teatro sang gera” batuk sa karibal sini nga imperyalistang China. Upod ang Japan, South Korea, Singapore kag iban pang pungsod sa ginatawag sini nga “first-island chain” o angut sang mga isla nga pinakamalapit sa China, ang Pilipinas subong ginapwestuhan sang US sang mga tinawo kag kagamitan militar nga handa gamiton sa tion nga mag-igrab ang gera.

Maathag katama ang ginhambal ni Lt. Gen. James Bierman, *commanding general* sang Third Marine Expeditionary Force (IIIMEF) kag Marine Forces Japan sang US, nga madugay na nga ginhandaan sang US ang paglunsar sang gera kontra China, kag ginhalimbawa ang paghanda nga ini sa ginhimo nila sa paghanda sang gera sa Ukraine batuk sa Russia. Sa interbyu sini lang sa Financial Times, ginhambal ni Bierman:

“Paano naton maagum ang lebel sang kadalag-an sa Ukraine? Daku nga bahin sini amo nga bangud halin sang pagsalakay sang Russia sang 2014 kag 2015, nagtutom kita nga maghanda sa mga gera sa palaabuton: paghanas sa mga Ukrainian, pagpusisyon sang mga suplay, pagtumod sang mga lugar kon sa diin pwede kita maghatag sang suportang operasyon, isustenir ang operasyon.... Tawag naton dira paghanda sang teatro. Ang ginahanda naton subong ang teatro sa Japan, sa Pilipinas kag iban pang lugar.”

Ginapakita sang mga tinaga nga ini ni Bierman ang kabugalon sang imperyalistang US sa pagduso sini nga ipatuman ang gahum sini diin man nga bahin sang kalibutan nga wala sang kunsiderasyon sa sobe-ranya sang mga pungsod, labina sang mga malakolonya sini pareho sang Pilipinas. Ginabilang sini nga daw tawu-tawo sa hampang nga *chess* ang mga pungsod nga “alyado” sini sa estratehiya sini nga palibutan ang China.

Sa paggamit sang US sa Pi-

lipinas bilang kabahin sang “teatro sang gera” sini batuk sa China, ginahimo ini nga *magnet* o target sang posible nga pag-atake sang China engkaso maglupok ang gerang US kag China. Hayagan nga pagbastos sa independensya sang Pilipinas ang paggamit sang pungsod nga lunsaran sang US sang mga gera sini sa luwas sang pungsod.

Nahimo ini sang US sa Japan, South Korea kag Pilipinas bangud ang mga nagapungko nga gubyerno sa mga pungsod nga ini mga sunud-sunuran sa dikta sang US. Todo-lar-ga subong ang gubyerno ni Fumio Kishida sang Japan sa pakigkunsabuhay sa militar sang US, lakip ang pagpadaku sang gasto para magbakal sa US sang mga misayl nga sarang mag-igo sa mga target nga 1,000 kilometro ang kalayuon. Ginatulod man ni President Yoon Suk Yeol sang South Korea ang pagpwesto sang mga armas nukle-yar sang US sa ila pungsod. May

mga daku nga base militar ang US lunsay sa Japan kag South Korea.

Sang nagligad nga tuig, gindeklarar sang gubyernong Marcos ang plano nga hatagan-dalan ang pagtukod sang US sang lima pa ka mga pasilidad sa mga lugar nga ginpili sang US: duha sa prubinsya sang Cagayan, kag tig-isa sa Isabela, Zambales kag Palawan. Dugang ini sa lima na nga pasilidad militar sang US sa sulod sang mga kampo sang AFP nga gintukod sa idalom sang Enhanced Defense Cooperation Agreement (EDCA). Ginapatihan nga pagagamiton sang US ang mga pasilidad nga ini para ipwesto ang mga *ground-to-air missile system* nga nakatumod sa China.

Ang amo nga pasilidad kabahin sang estratehiya sang US nga itulod ang China nga “una nga maggabot sang pusil”. Lakip sa pagpanulsol nga ini ang pagpalayag sang mga barko de-gera sa Taiwan Strait nga ginakilala nga teritoryo pangdagat sang China sa idalom sang One China Policy, dugang pa ang wala untat nga pagpalayag sang mga *aircraft carrier* sini sa nakatundan kag sidlangan nga kadagatan sang Pilipinas kag sa sidlangan sang Japan, lakip na ang sunud-sunod nga mga “paghanas sa gera” sa Pilipinas, South Korea kag Japan, subong man sa India, malapit sa lindero sang China.

Ang pagpanulsol sang US sang gera sa China kabahin sang pagtulod sini nga kontrolon ang mga balaligyaan kag pagakuhaan sang resorsa. Ang pila ka dekada nga pakighimbunanay sa mga monopolyo burukratang kapitalista sa China subong isa na nga naghahana nga banggianay sa ekonomya kag militar. Tuyo sang US nga agawon ang mga malapad nga balaligyaan nga ginadominahan sang barato nga produkto sang China.



Naval Station Carlito Cunanan: base militar sang US sa Palawan

Ang Naval Station Carlito Cunanan (NSCC) isa sa duha ka base militar sang US sa Palawan sa idalom sang Enhanced Defense Cooperation Agreement sang US kag Pilipinas. Gintukod ini sa idalom sang rehimeng Aquino II bilang kabahin sang pagsiguro sang US sa kontrol sang Indo-Pacific. Kabahin ini sang ginatawag “first island chain” (Japan, Taiwan, Pilipinas, Borneo, kag iban pa) batuk sa China. Makit-an ang NSCC sa Oyster Bay, kabahin sang Ulugan Bay sa Puerto Princesa City.

Ang amo nga base militar likom nga ginpauswag kag gingastuhan sang AFP nga may suporta sang US agud mangin “mini-Subic” para alagaan ang mga suldado nga Amerikano kag pati ang istasyon sang mga barko de-gera sang imperyalismong US. Ginatantya nga 160 kilometro ang kalayuon sini sa Spratly Islands kon sa diin nakaposisyon ang mga pasilidad militar sang China.

Sang gintukod ang NSCC sa Ulugan Bay, ginguba sini ang naturalisa kag nagdul-ong sang polusyon sa kapalibutan. Gindalasa sang mga imprastruktura kag pasilidad militar sang US ang manggaranon kag protektado nga mga bakawan kag mga

bahura. Wala sang permit halin sa Community Environment and Natural Resources (CENRO) ang ginhimo nga pagpang-utod sang mga puno sang kahoy sa lugar sa diin protektado nga erya ang look.

Grabe ang epekto sini sa kabuhi, pangabuhian kag propyedad sang may 1,700 residente sang Barangay Macarascas, isa sa lima ka baryo nga nagapalibot sa Ulugan Bay. Lapnagon nga ginpalayas ang mga residente nga nagapuyo sa lugar pagkatapos idemolis ang masobra sa 100 puluy-an agud hatagan-dalan ang base militar. Nadulaan sang lugar para sa pangabuhian ang mga mangingisda bangud bug-os nga Ulugan Bay nangin kaba-

hin sang pantalan sang mga daku nga barko de-gera sang US. Ginalut-hang sang mismo mga suldado nga Pilipino ang bangka sang mga mangingisda nga magapalapit sa look.

Nagdulot ang base militar sang mga pag-abuso sa pumuluyong Palawño. Naghabok ang mga kaso sang pagpangdahas, pang-abuso sa mga kababainhan kag bata kag iban pang paglapas sa tawhanong kinamatarung sang mga mersenaryong suldado nga Amerikano kag AFP. Naglapnag ang prostitusyon kag *sex trafficking* pagkatapos tukuron ang hilera sang mga bar o balay-kalingawan sa Puerto Princesa agud magserbi sa mga suldado nga Amerikano. May mga report nga may isa ka *van* nga nagaunod sang mga kababainhan nga ginsulod sa mismo sayt kon sa diin ara ang NSCC.

Ginkuha halin sa Ang Pulang Larangan, rebolusyonaryong pahayagang masa sa Palawan.

AB

Aerial bombing sa komunidad sang mga tumandok sa India, ginkundenar sang CPI (Maoist)

GINKUNDENAR SANG Communist Party of India (Maoist) ang brutal kag desperado nga pagpamomba sang mga armadong pwersa sang gubyrno sang India sa indi magnubo sa siyam ka komunidad sa parte sang South Bastar sa lindero sang Chhattisgarh-Telangana sang Enero 11 sang aga. Siling sang grupo, nagsugod sa alas-11 sang aga ang wala untat nga paghulog sang mga bomba sa komunidad para magsabwag sang kahadlok kag kugmaton ang mga tumandok.

“Maathag sa ginhimo nga ini sang reaksyunaryong gubyrno kon paano ka desperado ang pasistang Bharatiya Janata Party nga dugmukon ang mga pwersang Maoista,” siling ni Kaupod Abhay, tagapamaba sang CPI (Maoist). Siling niya, napilitan nga maggamit sang mga salakyan pangkahanginan ang mga pasista bangud sa kahadlok nga magsulod sa kadutaan sang kagulangan kon sa diin posible nga sug-alawon sila sang armadong pagbato sang mga tumandok. “Bangud ang mga tawo sa mga rehiyon nga ini may mataas nga pulitikal nga kamuklatan, nagakurog sa kahadlok ang Central Reserve Police Force kag iban pang pwersa nga mag-operasyon sa kadutaan,” suno pa kay Abhay.

Tuyo sang mga pag-atake nga paatrason kag bungkagon ang paghiliusa sang mga tumandok para mabaligya ang tanan nga natural nga resorsa sa rehiyon sa mga imperyalista kag burgesya kumprador.

Sa atubang sang pag-atake sang kaaway, nahimo nga patamaan sang mga pwersa sang People’s Liberation Guerrilla Army sang CPI (Maoist) ang nagaatake nga mga pwersa. Nasamad sini ang isa ka helikopter sang kaaway kag napilasan ang anum ka pasistang suldado.

Suno pa kay Abhay, nakasiguro sila nga pasingkion pa sang gubyrno sang India ang paggamit sang *aerial strike* kag *aerial bombing* agud lagson ang pamunuan sang CPI (Maoist). Ugaling, siling niya, “dapat mahibal-an sang kaaway nga indi matumbasan sang mga bomba kag *drone* nila ang kahandaan nga magsakripisyo sang kada isa ka gerilya, indi sini madugmok ang rebolusyong Indian.”

Presensya sang US sa Cagayan, ginasiikway

GINASIKWAY SANG PUMULUYO sa Cagayan Valley ang nagahana nga pagtransporta sang mga kampo militar sang AFP pakadto sa mga pasilidad sang militar sang US, sandig sa pagdugang sang lima pang lokal nga kampo sang US sa idalom sang bangian nga Enhanced Defense Cooperation Agreement. Pagagamiton sang US ang mga pasilidad nga ini bilang permanente nga base sang gamit-militar kag tropang Amerikano.

Sa tantya sang National Democratic Front of the Philippines-Cagayan, ipagamit sang papet nga rehimeng Marcos sa mga pwersa sang US ang mga kampo sang AFP sa Sta. Ana kag Lal-lo. Isa pa ang 50-ektaryang duta nga ginaagaw subong sang AFP halin sa mga mangunguma sa Divilican, Isabela.